

Edizioni

- letto 204 volte

Wallensköld

I.

Por mau tens ne por gelee
ne por froide matinee
ne por nule autre riens nee
ne partirai ma pensee
d'amors que j'ai,
que trop l'ai amee
de cuer veri.
Valara!

II.

Bele et bionde et coloree,
moi plest quanq'il vous agree.
He, Deus! car me fust donee
l'amor que vous ai rouvee!
Quant prierai,
s'ele m'est vee,
je me morrai.
Valara!

III.

Dame, en la vostre baillie
ai mis mon cors et ma vie.
por Deu, ne m'ociez mie!
La ou fins cuers s'umilie
doit on trouver
merci et aïe
pour conforter.
Valara!

IV.

Dame, faites cortoisie!
plaise vos que en ma vie
iceste parole die:
ma bele, tres douce amie
vos os nonner,

c'onques n'oi envie
d'autrui amer.
Valara!

V.

Onques jor ne me soi plaindre,
tant seroit ma dolor graindre;
ne d'amer ne me sai faindre,
ne mes maus ne puis estaindre,
se je ne di
que touz vueil remaindre
en sa merci.
Valara!

VI.

Trop seroit fort a estaindre
chansons de li;
l'amors est a fraindre,
dont pens a li.
Valara!

- letto 172 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-448>